

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板在該激啊激仔¹。無人出入个魚市場裡肚，斯單淨留等，幾蕊²孤栖个電火，還過，幾臺摧啊摧仔³个抽風機。

魚市場外背闊闊个停車場這片，擎花擎花仔⁴停等幾臺自用車，還毋想睡个駛車人，有人帶等罐頭來供流浪狗、也有人帶等釣槓來湊月光釣魚仔。魚市場該片遠遠个停車場脣頭，幾下个越夜越有元氣个後生人，載等掛有大喇叭个音響，摺車後斗撒向天、三臺車仔比比企，在該咚滋咚滋⁵尋月光共下跳舞。

正手片个音樂聲撓⁶到个脚底痲痲⁷，毋過，左手片騎等過个兩臺奧多拜，錫著个目光。个踈等个身影，行上兩百八十

公尺長个笨鯊橋，想去看，掛等頭燈个兩隻網魚人，係愛網麼个魚仔？月光也勾頭出來咧，一浪一浪个水紋，在月光下看到清清楚楚，一張魚網、兩個網魚人，落網、收網，撈起來个係一網个月光。雖然，連魚屎都無，毋過，个兜還係有講有笑，个想，个兜怕係為著愛打嘴鼓來个，網魚仔，單淨係兩同年想在月光下共下奈个理由定定。

橋下个河壩水，也認同个想法，「係啊，係啊！」緊應緊大聲，个緊聽緊生趣。毋過，摺个看真來，該「係啊，係啊！」个聲哨，怕係河壩水分海浪打轉來，抑係海浪激上河壩水个聲啊！

毋多知仔，就分个行過笨鯊橋咧。橋這片，日時頭分个箭到轂轂个自行車，這下通棚一列一列企好、企正，在月光下恬靜。光華華个路燈下，無人上下咧，斯單淨一隻揸等螺殼个毛蟹，對白沙堆勾頭出來又囡倒轉去，對路脣越過來又越倒轉去，自家在月光下搞个園人尋。个企在路脣，看毛蟹、看流流流流个河壩水，在共样个月光下，當像分个看著，頭擺，該一大陣笨鯊入港時，客家打漁人个兜面町⁸个笑容。

¹ 激啊激仔：音 gieb` a+ gieb` er；液體來回晃動貌。

² 幾蕊：音 gi` lui；幾盞。

³ 摧啊摧欵：音 kog` a+ kog` er；此為形容機器轉動的聲音和狀態。

⁴ 擎花擎花仔：音 lo` fa` lo` fa` er；稀疏間雜著其他花色的樣子。

⁵ 咚滋咚滋：音 dung` zii` dung` zii`；形容電子音樂的節奏聲。

⁶ 撓：音 neu`；搔、抓。

⁷ 痲痲：音 hoi hoi；癢癢的感覺。

⁸ 面町：音 mien` nen`；臉上。

111 年全國語文競賽客家語朗讀文章高中學生組（海陸腔）

編號 2 號

【夜鷹】邱一帆原作

毋記得在哪時起勢，佢輒常在斷烏¹，聽著天頂傳來「追佢啊追佢，追佢啊追佢」个聲，一聲又一聲，一直對半夜喊到天光，該吵耳塞窟个叫聲，正會對佢个耳空肚消失。當多年前，佢第一擺在屋下聽著該恁尖恁高个聲，實在當佇毋著，趑趑行出屋面前去看。該烏烏像細雞子个身影，在天頂飛啊飛、迂啊迂仔²。成時，毋知係飛到恁咧，抑係麼个，烏黔烏黔³个烏身，會頓腳在屋頂，「追佢啊追佢，追佢啊追佢」个叫聲，還係一聲喊過一聲。

該係麼个鳥？聲哨仰會恁吵人？佢遽遽走轉屋肚去，當認真上網路頂去尋資料，尋上尋下，正發現該種形投个鳥仔，名就安到夜鷹。想起來試著當奇怪！早早在 1861 年就有人在臺南發現佢个影跡，離這下有一百五、六十年咧，既經算係臺灣特有亞種个鳥仔，對山頂到平洋、對莊下到都市，滿哪仔都看得著佢个身影、聽得著佢个叫聲。做麼个佢食到四十大零歲咧，正第一擺在南庄聽著、注意著恁樣个鳥聲、知著恁樣个鳥名呢？佢試著當敗

¹ 斷烏：音 ton`vu`；入夜。

² 迂啊迂仔：音 din`a`din`er；轉啊轉的。

³ 烏黔烏黔：音 vu`him`vu`him；淺黑色。

勢！敗勢自家無好好認識，一直生活在身邊个鳥仔。

逐年新曆二月到八月，係臺灣夜鷹尋伴个繁殖期。七隻月恁長个時間，逐隻鳥公就想愛尋著自家理想个對象——鳥嫲，互相培養感情，繁殖下一代。乜一直愛等到孵出後代，細鳥仔會飛、離開鳥公、鳥嫲个保護，正算完成傳宗接代个任務。所以，在這期間，鳥公對斷烏到天光，會緊喊出「追佢啊追佢，追佢啊追佢」這吵死人个聲骸，來宣示領域，嚇走其他可能个入侵者。也因為夜鷹个聲哨難聽又大聲，有當多好恬靜驚吵个人，就恁樣分夜鷹吵到睡毋得，闕到望毋得夜鷹遽遽消失忒！

佢知夜鷹个聲哨當吵，吵到人食睡毋得，尋伴个繁殖期間，確實影響著人个生活。毋過，夜鷹毋係無一坵好，佢對環境也有一定个平衡⁴作用。夜鷹个嘴擘到又闊又利，會用來搶食蟲仔，不管係在暗暗个天頂抑係光光个路燈下，大水蟻、金蛄仔、草蟻，還過當多蟲仔，就係佢个食物、佢个好味緒。因為夜鷹个捕食習慣，多多少少也維持等該兜蟲仔个數量，乜保護著生態个平衡。

⁴ 平衡：音 pin fen；指一個物體的運動維持不變（亦即沒有加速或減速）的狀態。

111 年全國語文競賽客家語朗讀文章高中學生組（海陸腔）

編號 3 號

【芋荷葉个智慧】謝錦綉原作

這幾年長透會在報紙、電視新聞看著，魚仔肚屎肚有各種个塑膠絡。

這下，因為塑膠絡便宜又利便，不管燒个、冷个、冰个東西，總下用塑膠絡張。無論上山、下海，大隻細隻个塑膠絡，用過就掉忒¹，大家慣勢恁樣無限制个使用塑膠絡咧。

三不二時看著新聞報導，海鯪死在海脣，研究人員破開肚屎，發現海鯪毋係發病死个，係因為食忒多人類掉在海竇肚个塑膠絡，無法度消化正死忒。海鯪歸身都係塑膠粒个毒性，其他海魚乜共樣，人又捉魚仔來食，這毒性又轉到人類本身來。結果就恁樣輪迴，魚仔源頭減少，大環境污染，人類自家乜係大食物鏈其中之一，健康當然受著盡大个影響。

今年正月過忒年，偌對嘉義上來臺北寮一、兩個月；偌姊戴新店山頂，有所在好種菜，逐擺有菜好摘，佢就坐車仔拿來分偌。

第一擺拿著佢用紙絡仔張等个青菜，偌先放冰箱，等到愛煮

時節，正打開紙絡仔看，唉哦！正知紙絡仔裡肚還用三層芋荷葉包等，毋係用塑膠絡包。偌就想：「阿姊啊，你正經跔毋着時代咧！這下還有麼儕用芋荷葉包東西？」偌偷偷在該笑阿姊。

煮飯時節，偌先拿一種菜出來煮，旨食个菜照原旦用芋荷葉包轉去，共樣放在冰箱。過兩日仔菜食忒，去拿第二種菜來煮該時，打開芋荷葉，無想着，包在葉肚个青菜，還本本萋萋，到這下，偌正知芋荷葉恁好用。

這下个時代，科技發達，大部分人總係認為新个發明較進步，所以輒輒舊換新，舊東西大家就掉忒。毋過，不管新抑舊，大家總愛想較長久、想較遠兜，該兜毋會綿、毋會歿个垃圾，越留越多，留到最尾，地球斯會分垃圾搵忒²。到該兩時，人無法度戴地球，後代子孫乜毋知愛去戴哪位正好？

芋荷葉毋單淨做得保存青菜、魚仔、肉，還比塑膠絡效果較好。東西食忒，斯膠芋荷葉掉忒，佢轉到地泥肚，自然綿忒，就會變成肥料養分，全無打爽。芋荷葉無毒性，毋會污染環境，顛倒分地球淨俐，分人類健康，這係頭擺人个智慧，愛記得正好。

¹ 掉忒：音 tiau' ted；丟掉。

² 搵忒：音 eb ted；覆蓋、掩埋。

111 年全國語文競賽客家語朗讀文章高中學生組（海陸腔）

編號 4 號

【老鼠】張捷明原作

老鼠有當多種：田鼠、透地鼠¹、錢鼠、大老鼠、細老鼠……，田鼠在田肚絡食，盡愛食番薯，當大條，又有肉，係頭擺人無豬肉好食該下，當重要个肉類來源之一。

再過講透地鼠，佢戴在地泥下，當愛打窿，蒔禾仔个水田，在收冬該下種番薯雜作，係有透地鼠，等到交春蒔田，田塍²長下會漏水，穩水田嘎變漏水田。山田个田坎較高，還會慢慢崩田礮，就係老古人言：「大漏漏毋長，細漏漏燥塘。」意思係講，山魚塘係有老鼠窿，大窿漏大水，會緊張，斯算仰般無閒，也會抽間³去塞起來。毋過，細窿漏細水，無閒个耕種人就會想，正一息仔定定，就無抽無間，想講天光正來補，結果第二日又毋記得，等到想著，魚塘水早就燥忒咧。

田鼠會爽番薯，人就捉老鼠來食，算係一報還一報打平過。透地鼠當得人惱，毋過，做得分人想著這句老古人言教子孫，也算佢還有兜功勞。

另外，還有錢鼠，錢鼠實在就得人惱，戴在人屋下个圳溝肚膠烏疏疏个所在，細細隻無幾兩肉，還一身臭臊拖蟹⁴，係現代阿姆當驚个細動物。毋過，大人乜當生趣，偏偏膠佢安名錢鼠，怕係講，這家人當有錢，穀倉正會有當多穀分錢鼠食，好得人類知好畜貓仔打老鼠，係無，金山銀山就會分佢食空。

毋過，這下天年倒貶，除忒田鼠、透地鼠、錢鼠，還加一種寵物鼠。寵物鼠無天敵，連貓仔就毋係佢个對手；這下人畜个貓仔，嘎毋敢打老鼠，還較毋敢打寵物鼠，在人个屋下，一頭畜老鼠服侍佢做阿公，一頭又試著對貓仔過意毋去，所以乜用飼料畜貓仔做寵物，毋單淨毋使寵物貓打老鼠，還膠老鼠放共下，表示貓、鼠世紀大和解，人類第一功。毋過，麼人會知貓仔係仰般想个呢？

二十世紀後，除了寵物鼠，世界又加一種較新品種个老鼠，毋使飼料，毋會屙屎，淨淨俐俐又毋會嚙人⁵，日日放在手巴掌惜日惜夜，還做得分人使嘴，佢安到滑鼠。巴掌捉等佢个臉身在桌頂一滑，手指膠一片耳空一點，就做得指揮電腦，指揮世界，指揮地球，難怪十二生肖，老鼠早就打第一，貓仔嘎紙頭無名、紙尾無姓，連膠老鼠比大細个資格就無。

¹ 透地鼠：音 pun^ˇ ti⁺ chu^ˊ；鑽洞鼠。

² 田塍：音 tien chin；田埂。

³ 抽間：音 chiu^ˋ gien^ˋ / chiu^ˋ kien^ˋ；抽空。抽出空閒時間，有關心、用心之意。

⁴ 臭臊拖蟹：音 chiu^ˋ so^ˋ rha^ˊ hai^ˊ；形容人滿身腥臭。

⁵ 嚙人：音 kiau ngin；糾纏煩人。

111 年全國語文競賽客家語朗讀文章高中學生組（海陸腔）

編號 5 號

【阿婆个烏鷄】曾菁怡原作

戴莊下樹多、田多、鳥仔多，天時好个時節，打早就做得看著電線頂高，佢共下像盲睡醒个斑鳩，抑係歸群嘍嘍嘎嘎在路脢絡食个屋簷鳥，成時還看得著在天頂飛來飛去个鷄婆。有一種鳥仔歸身个毛烏疏疏，斯在翼胛尾膠烏尾有一息息仔白毛，目珠、觜膠該瘦夾夾个腳係黃色个，安到烏鷄。佢總係跳啊跳、跳啊跳仔，毋多知就帶佢跳落有佢婆个回憶裡肚。

阿婆係篤實个莊下婦人家，溫和恬靜，為著家庭，一生人就像挨挨轉个極樂仔無時間。天光就跣床炆豬菜分豬仔食；天矇矇就揸等衫褲去河壩脢洗衫；衫褲晾好又趕緊去菜園落肥、淋水。除忒這兜，還愛煮三餐、畜頭牲、做田事……。放晝該下，阿婆正有好歇暍，佢最愛坐在門口个藤椅頂高，目絲絲仔享受微風吹在面町¹个鬆爽。

有一日放晝，阿婆正坐下來準備歇暍，目珠影著外背个竹筴下有一團烏疏疏个東西在該停動，行兼去看，發現係一隻還毋會飛个烏鷄鳥子。阿婆膠佢捉在手町，從頭看到尾、從尾看到腳。

¹ 面町：音 mien^ˇ nen^ˋ；臉上。

一下揸佢个頭那頂膠面頰卵；一下掀開佢幼嫩个翼胛，搵過來搵過去，像細人仔抓著生趣个玩具，看到目金金無眨目。

阿婆想起閒間仔有一隻頭擺阿叔畜鷹哥个鳥籠仔，就決定膠這隻鳥子畜起來咧。逐朝晨，阿婆面洗好就去看籠仔裡肚个飼料還有無？愛過添水無？一有閒就膠鳥籠仔拚到淨俐淨俐。食飽晝，阿婆就會膠藤椅徙到籠仔脢，佢兼籠仔教烏鷄講話：「天光咧！」、「食飽冇？」、「大家好！」、「正來奈」……。日見日，該烏鷄看著人也會講阿婆教佢个話咧。

無想著，有一日朝晨，籠仔門毋知仰般分人打開來，裡肚个烏鷄也毋知去哪位咧？阿婆兩隻手捧等飼料，頭磬磬仔企在籠仔脢，久久正接受烏鷄毋見忒个事實，還喃喃喃喃講：「恁打爽，畜恁久咧！」該隻鳥籠仔又收落閒間肚囤咧。

這拜日阿婆做對年，阿姆交代愛轉老屋祭拜。燒金該下，幾下隻烏鷄在竹頭下跳啊跳、跳啊跳仔，成時擎頭這看該看，背尾就飛到竹林肚去，斯伸風吹過竹葉絮絮疏疏²个聲。毋知阿婆這下有膠佢講話个烏鷄無？

² 絮絮疏疏：音 si^ˇ si^ˋ so^ˇ so^ˋ；狀聲詞。

111 年全國語文競賽客家語朗讀文章高中學生組（海陸腔）

編號 6 號

【網出阿姆个背影】徐熏琪原作

網路就像係一面洋洋洋洋無邊無脣个大海，網等人摺人之間个距離、網等世界个脈動、網等日常生活。佢，就像係一尾魚仔，輒常洩落網肚遊遊野野，緊洩緊深、緊洩緊遠……。

還記得讀國中愛開學个前幾日，阿姆拿等一支手機講愛分佢用。頭下碼，佢疑狐係毋係耳空聽个有爭差，一直到撻著手機，佢歡喜到耐毋得，心肝肚想，總算有一支手機咧！正想愛仰般好好來使用這手機該下，就聽著阿姆講：「分你手機，係方便你摺屋下人聯絡事情哦！毋係分你拿來變鬼變怪个，也升國中咧，自家愛曉得自重，敢做得到？」佢踅等點頭講：「阿姆放心啦！佢用手机定著會有分寸。」

續等幾日過後，手機裡肚三不二時就跳出遊戲、社交軟體个訊息，「阿姆放心啦！佢用手机定著會有分寸。」這句話早斯變成一陣風，飛到天背恁遠去咧！

網路世界切斷阿姆摺佢之間个信任，毋多知仔摺屋下人講話个時間越來越短，摺手機相處个時間越來越長；搵手做家务个時間越來越少，洩落手機个時間越來越多，佢就像今這下个低頭族

樣，係講拿起手機，想愛放下斯係無恁該个事情咧。

記得有一日吃飽夜過後，佢堵好摺同學搞等緊張刺激个線上遊戲，阿姆喊佢好去洗碗箸咧，佢詐意無聽著，過無幾久阿姆又過喊加一到，佢就闕猝猝仔應：「大細心！逐擺就喊佢！屋下斯伸佢一儕人咩？」無想著這句話深深刺落阿姆个心。阿姆聽著後，恬恬仔行落灶下去洗碗。佢看著阿姆洗碗个背影，感覺著頭下對阿姆堵堵撐撐¹嶄蠻²過分，就遽遽放下手機摺阿姆會失禮，摺阿姆手町³个碗箸接來洗。

該暗晡為著這件事睡毋落覺，腦膈肚現出阿姆洗碗个背影，該背影就像一面鏡仔，照等阿姆腰掛背吊个身影，嘎映出佢無上無下个行為；照等阿姆對佢个開容笑面，嘎映出佢對阿姆目睭睭仔个面目。更深夜靜，佢个反省比夜還較長，經過這擺个事件，正感覺著佢个日常生活既經分網路世界縝縝，漸漸疏離屋下人个互動。所以，佢想尋轉阿姆對佢个信任，愛自我要求正確來使用手機，學校作業一定愛先完成、搵手做忒家务後正使用手機，還愛記得摺屋下人多多相處，大家和和接接過日仔，該正係盡有溫情个家庭生活。

¹ 堵堵撐撐：音 du du cangˊ cangˊ；頂嘴。

² 嶄蠻：音 zamˊ man；相當的。

³ 手町：音 shiuˊ nenˋ；手上。

【採筍蟲】郭亭好原作

還細時節，爺哀為著愛畜偈兜這群大細，歸日無閒到換換轉，屋下肚長下伸著偈幾個細孬仔，搞恹咧，毋係伏在長凳板町¹睡，斯係在門檻下睡到四腳惹天，天生天養，該係偈識行過个童年。

等阿哥較大咧，佢會渡偈兜滿山滿田去拈囊蠅仔、打草蟻，又摘土杌仔、土樣仔²這兜來食。該時，屋背有種一大埕³个烏葉竹，上筍个竹仔暴芽斯會有筍蛄來拈竹筍尾生卵；狡怪个阿哥會渡偈兜去捉筍蛄來搞。阿哥捉筍蛄个本等一等慶，佢講愛細義兜，毋好嚇醒筍蛄，看佢無幾出力，一下斯摺佢擇下來⁴，分佢看著个筍蛄無一隻走得忒。佢摺捉來个筍蛄用棉線絹等放佢飛，偈兜踅等筍蛄走，該線仔一下長、一下短，像放紙鷂樣，等偈兜搞恹咧，正摺線解忒⁵放佢走。

一擺阿哥嘴豺，渡偈兜去尋正生出葉仔斯黃忒个嫩竹，阿哥

講有筍蛄在該位生卵，裡肚會有筍蟲好捉；看阿哥大力摏⁶該葉仔黃忒个嫩竹，分佢倒拗下來，正經看著筍蟲蠕蠕動，偈兜遽遽跔下去搨拈。轉到屋下，阿哥斯摺這兜筍蟲放落鑊肚用油煎，偈兜企在灶頭脣脰啲啲仔等，目金金看等該香香赤赤个筍蟲，口水強強斯會跌下來咧！毋過一儕正做得分著幾尾筍蟲定定，偈摺老弟三、兩口斯啖淨淨咧，阿哥看著遽遽過摺佢碗肚个筍蟲分兜偈兩儕過願。該兩時，阿哥恁肯分等來食，偈兜嘎無感念阿哥惜偈兜个情意，斯知好顧嘴空，這下想起來，試著對阿哥當敗勢。

有一日，隔壁个阿姨來分阿姆請食晝，番綻个阿哥知阿姨毋敢食筍蟲，斯挑挑搥耍佢，摺煎好个筍蟲粹落阿姆正煎好个魚肚裡背，阿姨話著係魚卵，盡命拈食，還緊安腦講恁好食。背尾老弟無細義嘎講出來，害阿姨拚等落便所嘔到設設滾⁷，該日阿哥斯分阿姆扭等耳空去摺阿姨會失禮，還分阿爸罰去阿公婆牌頭前跪歸下晝。

這下恹起細人仔時節，雖然無像這下人生活恁豐湧，毋過日仔過著當自在，當多該下好搞个齣事，一息都毋會輸這下細人个網路遊戲，偈兜在田肚山排走相追个腳跡，還深深印在偈个腦膈肚，係盡生趣个回憶。

¹ 長凳板町：音 chong den` ban` nen`；長板凳上。

² 土樣仔：音 tu` son` er；土芒果。

³ 一大埕：音 rhid tai` pu；聚集一堆。

⁴ 擇下來：音 dui` ha` loi；拉下來。

⁵ 解忒：音 gie` ted；鬆脫。

⁶ 摏：音 cai；速度快且用力搖晃的動作。

⁷ 設設滾：音 og` og` gun`；愈嘔吐聲。

111 年全國語文競賽客家語朗讀文章高中學生組（海陸腔）

編號 8 號

【花樹下个童年】李宜諭原作

美濃永安老街在美濃河个北片，歸條永安路對東門樓到德勝伯公壇，分做上莊、中莊、下莊。佢屋下戴「花樹下」，係前莊，這位有南柵門渡船口，係永安老街最鬧熱个地方。

花樹下深深刻印等佢个童年。佢姆 49 年嫁來美濃，就在美濃國小教書，還記得，總會看著佢在操場町¹教大會舞、在禮堂教民俗舞，還有扇仔舞、筷仔舞、彩帶舞。佢人緣好、手腳流掠，鄰舍个細妹仔、婦人家都會送佢剪伸个布仔，佢就拿來做靚靚个衫褲分佢兜著，所以，佢恁多姊妹讀小學个學生帽、制服、洋裝、裙、褲，大體都係阿姆做個。

佢爸也係先生，佢當會渡等佢兜做童玩，像：雞毛錢仔、銅笕車、竹蟬仔、竹囊蚘、竹筒打高腳、紙鷗。該年代，歸伙房人共下用一隻便所，便所下背係糞缸，看著恁深个屎窟，佢就會頭那昏昏驚種下去²，所以毋敢落去，阿爸就逐朝晨載佢兜細姪仔去學校上便所，一儕一間，屙忒正共下轉屋。

還言入學前，佢摻大老妹都係跔等阿哥出去寮，去河壩脣灌土狗仔、搞園人尋；去田町³釣蜗仔；去河壩底覓大肚魚；坐在美濃舊橋頂高看河壩；在伙房裡背穿上穿下；去阿婆个河壩埔菜園搞寮；蹶落鄰舍个圍牆裡背搞搨跤腰，鄰舍闕著就會放狗出來追佢兜，佢兜就恁樣練一身蹶牆个工夫。

冷天過啊忒，美濃河還無麼个水，舊曆二月二伯公生會「做大戲」，係美濃一年一擺做鬧熱个時節，所有嫁到別位个阿姑、阿姨、姨婆、姑婆都會轉來永安老街，在親戚屋下戴幾下日，就係為著愛「看大戲」。在南柵門渡船口个河壩脣，會搭當大个戲棚，戲棚下係佢兜搞寮个好地方，一群細人仔也會偷偷走到舞臺後背看佢兜化妝、換衫褲。

開始做戲咧，除忒頭前幾排个老人家坐等看以外，其他人都係企等看，有兜人還會企在凳頂。細人仔根本看毋著，阿爸就會摻佢兜擎在肩頭頂，分佢兜看過願，毋過，因為看毋識也聽毋識，阿爸就會拿幾角銀分佢兜去買食，賣打煙腸、山楂仔、圓子汽水个攤仔，生理一等好。佢阿姑屋下就戴在河壩脣，姑婆、姨婆摻阿婆就會坐在阿姑屋後背，愛下去河壩底个碇仔頂看戲，佢想，佢兜應該都係用聽个啦！「看鬧熱」順續共下「打嘴鼓」。

日見日，年堵年，大人無閒直掣過著遽，細人仔歡喜搞寮定定大。

¹ 操場町：音 cau` chong nen`；操場上。

² 種下去：音 zhung` ha` hi`；栽下去。

³ 田町：音 tien nen`；田裡。

111 年全國語文競賽客家語朗讀文章高中學生組（海陸腔）

編號 9 號

【舉重仙女】蔡承軒原作

阿美生來拗蠻靚，當像仙女下凡。

厥爸當驚阿美在路町¹堵著惡人，就尋來健身教練訓練阿美。一開始話著阿美會反抗，無想著阿美上課以後就愛上舉重。過後，阿美一下課毋係在健身房，就係去健身房个路上。

阿美進步當遽，擊个重量緊來緊重。雖然試著盡食力，毋過佢看著自家个進步也試著值得咧。有時節練到歸身痠痛，也當想偷懶；有時節無細義著傷，也想愛放棄。逐擺阿美愛放棄該下，就會想著有人講過：「危險係確實有个，毋過愛驚佢抑毋驚佢，係你自家个選擇。」在訓練个過程裡肚，佢了解愛看著山頂該恁靚个光景，定著無恁該。

一瞞目，過忒幾下年。這下舉重對阿美來講就像鼓氣樣恁自然，佢想愛做一個舉重運動員，鍛鍊身體个觀念傳揚分較多人知。教練試著分阿美參加比賽个時機到，阿美無分大家失望，在頭一擺比賽就得獎。佢無半息自滿，因為阿美有較大个目標，該就係參加奧運。

¹ 路町：音 lu⁺ nen[`]；路上。

逐日訓練過後，教練都會陪等阿美共下看優秀選手个影片，檢查自家還有哪爰改進。阿美也陸陸續續參加比賽，漸漸仔緊來緊多人認識佢，外背个人摻佢安一隻偏名：「舉重仙女」。

經歷過千辛萬苦，阿美總算得著代表臺灣參加奧運个機會，這係佢幾下年來个夢想，毋過時間及及，佢黏時愛投入訓練，正做得拿出最好个表現摻國家爭光。

在當多湛斗人才个奧運場肚，無半儕知阿美係麼人，甚至還有兜仔藐視，這個頭一擺來參加比賽个黃皮膚細阿妹仔。毋過，阿美知佢目前愛做个就係拿出最好个表現，毋使聽人狗呷烏蠅，正經強个人總係用成績來講話。跨等比賽緊進行，斯算阿美个分數跨人毋著，佢還係煞猛牯齧等牙根，當遽就來到最尾一關个挺直擊²，教練摻阿美思量過後打算盡命牯去拚，去試毋識擊過个重量，係講成功咧，阿美會係這屆奧運个金牌得主。

包尾非常打爽，阿美失敗咧。佢顛倒毋會試著見笑，因為佢知斯算失敗咧，總比無試過正來後悔較甘願。阿美發誓四年過後愛重新轉到奧運个比賽場肚，來摻臺灣爭取一坵金牌。

² 挺直擊：音 ten[`] chid[`] kia；挺舉。

【燿窯仔】劉玉蕉原作

打早，斯聽著阿婆交代阿姆，去市場割兜豬肉、買兜萋魚仔轉來，「欸，奇怪！有麼人做生日係無？」問過阿婆正知，係滿姑愛轉外家，怪毋得阿婆恁歡喜！探著滿姑轉來個時間，佢走去莊頭阿惜姨個雜貨店等，頭勾勾緊看。姑丈個車旨駛兼，佢斯走出去攞手咧，姑丈個車仔一頓恬，佢斯蹶上車，滿姑笑等講：「屎肫旨坐燒，斯愛下車咧，恁大閒情！」，知佢歡喜，佢尖落車肚斯摻姑表姐妹大聲搞起來。

滿姑帶個等路已錫人，逐儕都有一份外，車後斗還有一大布袋個番薯，阿婆講：「番薯恁多仰結煞，無斯來燿窯仔¹好咧，屋背田竇肚個泥，上禮拜正翻過，應該乜燥咧，恁俚來燿窯仔，愛無？」「好哦！湛啦！」聽著有好搞，佢這兜黏時斯應。

起窯仔哩啲，阿爸拗三砵大泥團做門，窯身斯尋像佢拳頭嫵恁大個泥砵來結，疊高了後還愛慢慢收兼來，幾下到，結到半爛燦斯扁下來，「唉，老刀嫵無鋼咧，無恁該食哦！」最尾還麻煩姑丈搵手，正順利搵好。窯仔一起好，阿哥斯下命令咧，佢喊佢

摻姑表姊妹去檢樵，阿姊負責起火、架樵，大姊當倚恃得，火分佢掌到猛猛猛，紅紅個火舌對泥砵縫仔鑽出來，像愛擘嘴食人樣，害佢這兜閃到遠遠遠，無幾久，泥砵斯像甜柿恁樣紅啾啾咧！

「好勢哩啲，樵毋好再過架咧，等樵退出來，斯做得擲番薯落去咧！」阿婆恁樣講。火炭掙開來，番薯斯一條一條擲落窯肚去。「哇！」表哥個擔竿一拈落去，紅紅個泥砵跔等扁下來，堵好奔在番薯等高，「建設難，破壞容易」，細人仔輪等拈泥砵，逐個都搵到一頭一面，背尾還係姑丈來收尾，佢摻幼泥委²頂背，用砂耙頓分佢撈，頂高還愛過插一支香，恁樣一滴煙都無出咧，正喊佢兜去搞。恁無簡單結起來個窯仔，這下看起來斯像一壟番薯壟樣！

園人尋個遊戲旨搞罇，遠遠斯鼻著香味咧，影著阿姆在該開窯，佢這兜遽遽行兼去看佢變奇術，阿姆驚怕番薯分佢摻綿，細心細意在該慢慢仔挖，定定仔摻，香氣錫到佢這兜口水浴浴跌，肚屎乜機哩咕嚕緊抗議。田塍町³，佢兜比比坐，香香個番薯塞歸嘴，天恁清，番薯恁香，在屋背個田肚，佢兜搞到斷烏正轉屋。

¹ 燿窯仔：音 kog rhau er；燻烤番薯。

² 委：音 ve+；撒。

³ 田塍町：音 tien shin nen`；田埂上。